

Mud Volapüka

Nüm 12

24 yunul 2016

Bukemaboed

Els ,俳句‘ (els ,*haiku*‘)

El ,俳句‘ binon fom vemo brefik poeda Yapänik. Mödadilo pakaladon fa patöfs kil:

1) leigod e steifül ad balön niludis, suemodis, tikamagotis tel taädik.

2) el ,haiku‘ vönaoloveik binädon me els ,音‘ (els ,on‘, „silabs“) 17 in sets kil mö 5, 7 e 5 els ,音‘ alik baiädiko.

3) komam ela ,季語‘ (el ,kigo‘, „vöd säsunik“, „lujon säsuna“), kel mödadilo pavälon se el ,歲時記‘ (el ,saijiki‘, „kronig säsuna“) - lised veitik ab stediko pifümetöl.

Hiel ,松尾 芭蕉‘ (Matsuo Bashō‘)

Mun lämpik.

Len lulak ünü neit lölik

Zigolob stunidölo...

„Fluküp ekömon ya!“ -
Vien evisipon ole lü lil,
Finilikölo lükölo lü bed obik.

Vifikumo, o flens!
Ugolobsös ad ziglibön su nif balid,
Jü ufalobs dub fen.

Loktop tö tröp
Drimon drimi — so brefik! -
Dis mun hitüpik.

In yebaläns lardik
Krän kaniton
Nen säkäds e bligs.

Pö soaralulit fluküpik
Vemo lunüpo livüps dulons
Lifa brefik.

Tö ludomil obik
Gulis fol valik mun elitastralon,
Fisülogedölo da vitür.

Florüp mogolon.
Böds drenons. Logs fitas
Pefulükons fa drens.

Lifüp obik lölik (jenon) pö vegam!
Äsif jüpob feli smalik,
Glibob usio ed isio.

Libelul viron nog...
No kanon dafanön jünu
Kaulis yeba blegülovik.

Igo pro krov gedik
Göd at binon lönedik -
Ekö, kiojönük evedon!

Vok fagik kukuka
Etonon nensekiko. Ibo nutimo
Poedans enepubons.

Rein sökon pos rein,
E lad no plu jäfikon
Tefü sprotians in fels risatik.

Hiel, 与謝 蕪村 ‘ (Yosa Buson‘)

Igo ravanacif,
Enoatädon-la kaniti
Ün neit soik tefü mun.



Sevols-li, das ... Butän



- 1) Regän Butäna binon lään in Sulüda-Siyop. Rel calöfik läna binon bud.
- 2) Tö Butän proibos deidön e yagön nimis, klu pluamanum sifanas binons härbatiman.
- 3) Reiganef Butäna ad jelodön kultiri balik e südis läna okik tadunon daglofi töra gretamafädik. Pro foginans valik, plä sifans Indäna, Bangladejäna e Maldiväna, dagetam visuma Butänik suämon mö dolars 250 a del ün säsun pötik e mö dolars 200 ün säsun nepötik.

Ab mon at ninädon ya lödöpi, nulüdoti e kopanam geidana pö veigöm. Refudön geidani nemögiko e tüp muik visita läna pamiedeton mö dels 15.



4) Butän binon län balatik kö dabnon Minister läba.

5) Nüveigam ini Butän dönotas kiemavik paproibon e valikos kel glofon in tail Butänik binon natik.

6) Tö Butän proibos smökön tö spadäds notik sis tumyel 17-id e sis yel 2004 sel tabaka löliko paproibons.

7) Radionabroadot tö Butän idavedon te ün yel 1973 e televidabroadot – ün yel 1999 as län lätikün vola.

8) Butän binon motedalän caramana jiel ,Dorji Dema'.



Lerät

Men semik igeton balna penedi se foginan, kel änu büo iküpedon vobi onik. Foginan epenon, das bal menas pebemastöl (pebüdöl) fa ladetäb vobon te ven ladetäb logeton (lögon) oni. Cali kinik ladetäb labon?

Tuvedot: in nüm sököl.

Tuvedot leräta se nüm büik:

Plakat äreklamon medinis ta maläds tel – nenslip e snok.

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».